

ARLeF: al torne in onde su Rai3 Fvj, XtremeTV, la prime serie televisive in lenghe furlane sui sports inusuâi e “estremis” de nestre regjon

Cinc pontadis (e ancjetantis replichis), cu la regjie di Giorgio Cantoni. Si partîs ai 29 di mai

+sKlet/XtremeTV: e je une serie televisive, in 5 pontadis di 18 minûts ognidune, prodote di Informazion Furlane cu la poie de ARLeF (Agenzie Regjonâl pe Lenghe Furlane) che e ufris al public une escursion fra lis ativitâts sportivis plui origjinâls che si fasin in lûcs naturalistics particolârs dal Friûl. Des cimis de Cjargne ae lagune di Grau e Maran, une ocasion par scuvierzi un microcosmi inspietât e sorprendent, fat di personis, lûcs e carateristichis che a fasin speciâl cheste regjon. Une produzion a bas cost cuntune dotazion lizere e une troupe di 5 personis, coordenade dal regist operadôr Giorgio Cantoni, ma cun **risultâts emozionâi e promoziônai tant interessants**.

Dopo un prin passaç su Rai3 Fvj, intal 2015, viodût l'interès dismovût, cumò **la Rai e à decidût di tornâ a programâ la serie tacant di domenie ai 29 di mai** (aes 10.40 plui o mancul). Chês altris **4 pontadis a saran mandadis intes domenii** dopo: 5, 12, 19 e ai 26 di Jugn, simpri ae stesse ore. Par cui che al ves di pierdilis, e je la pussibilitât di rivodi lis imagjins spettacolârs sul **cjanâl 103 (Rai3 bis), ducj i miercus di Jugn** (1, 8, 15, 22, 29), aes 21.50.

Lis ativitâts sportivis documentadis de troupe di Cantoni a son stadis sieltis pe lôr "spetacolaritât" e "particolaritât", pal impat ambientâl une vore bas e, ancje, pe facilitât di coinvolziment di un public no specialistic. Graciis ae disponibilitât dai istrutôrs des associazions coinvoltis e aes particolârs tecnicis di riprese, fatis cun *action cjamare* metudis sù dai sportîfs, si è cirût di tornâ indaûr al public lis emozions e lis pôris sintudis sul cjamp da doi presentadôrs zovins (Francesca Battistutta e Cristian Pressacco), ae lôr prime esperience sedi inte conduzion televisive che inte pratiche des variis disciplinis.

La specialitât di chescj sports e je chê di permeti ai partecipants une imersion complete inte nature, esplorant lûcs se di no inacessibii, cul canyoning (vignî jù di forans e salts di aghe), il downhill (frontâ in bici i trois di mont), il kayak di mâr, il kite-surf (la vele dal parecleve su la bree di surf) e il paramotôr, (la vele dal parecleve cubiade al motôr individuâl cu la eliche), nons in cualchi maniere esotics par definî praticis inusuâls che, cualchi volte, a puedin vignî definidis “estremis”.

Par ce che al tocje la lenghe furlane, veicolade in dutis lis componentis de produzion: dai dialics, ae grafiche, aes musichis, il so ûs si è palesât adat inte suaze inedite di une serie televisive cun carateristichis, contest e modalitât tant stimolante in tiermins di spettacolaritât e identificazion, une lenghe buine di trasmeti ae perfezion la relazion speciâl di condivison e rapresentance fra abitants e teritori.

Ogni pontade si conclût cu la presentazion di un ambit particolâr di ospitalitât turistiche. Par chest, a son stâts sielzûts lûcs impegnats te valorizazion de produzion locâl, in sintonie cu lis esperiencis e la culture de aree di apartignince.

Udin, ai 23 di Mai dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<